

佛說懈怠耕者經

宋居士沮渠京聲譯

聞如是一時佛在羅閱祇竹園中與大比丘衆千二百五十人及衆菩薩俱時佛從羅閱祇欲詣舍衛諸菩薩導前釋梵被服又見身體如四天王諸比丘僧悉從佛後諸天龍神在上供養去城不遠時有一人在田耕種遙見如來弟子侍從端正殊好威神巍巍容貌殊好如星中月奇相衆好金光從容三十二相皆出衆好遙見世尊心便歡欣欲往詣佛稽首作禮資受法誼佛世難值時時一現退自念言耕地未竟下種未畢須後閑時乃當見佛時佛知心發此懈怠世尊便笑五色光從口出照十方境界安隱五道皆乘光來集會佛所地獄休息餓鬼飽滿畜生思善人

民求度諸天龍神來聽道法賢者阿難解了七應誼法時節身與他人即詣佛所長跪叉手白佛言何因笑既笑會當有意佛告阿難汝見犁者不對曰已見佛言是人從維衛佛已來九十一劫於是耕種每一見佛常自懈怠選輒復後忽忽耕種生死罪法不識法犁種無極田已過六佛不得蒙度於今見我適發好心即便變悔欲故懈怠樂種罪根時人遙聞棄耕及田來詣佛所稽首佛足悔過自責愚癡無知罪過甚重願見愍傷原其罪過蒙冥抵突懈怠來久惟見原恕濟脫生死佛言善哉卿能覺者於法有益終不爲損佛爲說經示懈怠之垢精進之利踊躍歡喜立不退轉諸天龍神無央數千皆發無上心正真道意以故學道常當精進莫爲懈怠宛轉生

死佛說如是賢者阿難諸天龍神阿須倫聞
經歡喜作禮而退

佛說懈怠耕者經

第九

十